

Lescha d'ustrias dalla vischnaunca da Medel/Lucmagn

**Sebasond sin igl art. 26 dalla lescha d'ustrias pil cantun
Grischun dils 7 da zercladur 1998 (LU),**

relaschada dalla radunonza communal da dils 7 da schaner 2000.

I. DISPOSIZIUNS GENERALAS

Art. 1 Cumpetenzza

La suprastanza communal ei l'istanza cumpetenta per menaschis d'ustria. Ella ha da conceder la lubientscha e retrer ella tenor la LU.

Art. 2 Survigilonza

L'execuziun dalla legislaziun d'ustria cumpeta alla suprastanza communal.

II. LUBIENTSCHA

Art. 3 Damonda

La damonda per conceder ina lubientscha tenor art. 3 al. 1 dalla lescha cantunala ei d'inoltrar all'administraziun communal silmeins in meins avon che arver ni surprender in menaschi ni avon che organisar in arranschament.

La damonda ha da cuntener las suandontas indicaziuns:

- a) las persunalias e l'adresa dalla persuna per la quala la lubientscha duei vegnir emessa;
- b) l'indicaziun exacta dil menaschi ni digl arranschament;
- c) l'indicaziun exacta d'eventuals menaschis secundars;
- d) il cuoz giavischau dalla lubientscha.

Alla damonda eis ei d'aschuntar:

- a) in extract dil register penal;
- b) la confirmaziun cun suttascriber ch'el hagi priu enconuschientscha dallas prescripziuns dalla vischnunca e dil cantun.

Art. 4 Premissas

Aschilunsch che las premissas legalas ein ademplidas, vegn la lubientscha dada en scret alla persuna autorisada avon che arver ni surdar il menaschi ni avon che organisar igl arranschament.

Art. 5 Concessiun

Ella lubientscha sa vegnir fatg pretensiuns. Specialmein davart il dretg d'entrada ed il cuoz da dimora per ils giuvenils sco era davart las uras d'avertura e la protecziun encunter canera.

Art. 6 Giuvenils

Igl ei scumandau

1. da distribuir bubrondas alcoholicas a giuvenils sut 16 onns ed a stuorns;
2. da distribuir auas barschadas u bubrondas mischedadas a basa da bubrondas barschadas a giuvenils sut 18 onns;
3. da dar access publicamein a bubrondas alcoholicas cun agid d'automats.

Art. 7 Engrondiments, transferiment, midada dalla specia da menaschi

Engrondiments considerabels ed il transferiment da menaschis sco era midadas dalla specia da menaschi basegnan ina lubientscha speciala.

Per la damonda vala igl art. 3 al. 1 e 2 conform il senn.

Art. 8 Commerci en detagl cun auas barschadas

Damondas per conceder ina lubientscha pil commerci en detagl cun auas barschadas ein d'inoltrar ad uras sil formular ufficial agl uffeci cantunal per economia e turissem e quei avon che arver ni surprender in menaschi ni avon che organisar in arranschament.

Il formular sa vegnir retratgs dall'administraziun communal.

III. TEMPS D'AVERTURA

Art. 9 Temps d'avertura

Ils menaschis d'ustria sco era las organisaziuns d'arranschaments publics san fixar lur temps d'avertura tenor lur agen pareri.

Art. 10 Arranschaments

Per arranschaments sa vegnir fixau uras d'avertura pil singul cass.

Art. 11 Termin da toleranza

Hosps d'arranschaments publics han da bandunar quels sil pli tard 30 minutas suenter la scadenza dallas uras d'avertura lubidas. Duront il termin da toleranza eis ei scumandau da consegnar spisas u bubrondas.

Art. 12 Excepziuns

Las notgs dallas vigelgias sin las fiastas aultas (Nadal, Pastgas, Tschuncheismas, il Venderdissogn e la dumengia dalla Rogaziun federala) ein arranschaments publics buca lubi.

IV. TAXAS

Art. 13 Taxas da lubientschas

Per dar ina lubientscha vegn incassau las sequentas taxas:

1. per menaschis fr. 100.— tochen fr. 500.—;
2. per arranschaments publics fr. 0.— tochen fr. 500.—;
3. per engrondiments, transferiments, midadas dalla specia da menaschi fr. 50.— tochen fr. 300.—.

Per fixar las taxas el singul cass eis e da risguardar adequatamein ils cuosts administrativs sco era igl interess e la productivitat economica dalla persuna obligada da pagar la taxa.

Art. 14 Taxas specialas

Per ulteriuras funcziuns officialas sco controllas extraordinarias da singuls menaschis ni arranschaments vegn ei incassau ina taxa da fr. 200.— tochen fr. 1'000.—.

V. DISPOSIZIUNS PENALAS, MIEDS LEGALS

Art. 15 Controlla

Per garantir l'execuziun da questa lescha ed oravontut il ruaus nocturn, sa la suprastonza communal engaschar tenor basegns in survetsch polizial da survigilanza.

Art. 16 En general

Cuntravenziuns e surpassaments da questa lescha, da disposiziuns executivas sco era encunter la lescha cantunala d'ustrias e las disposiziuns executivas da quella vegnan punidas dall'istanza communal competententa cun in castitg da tochen fr. 10'000.—, aschilunsch ch'ei vegn buca en damonda disposiziuns penals dil dretg federal.

En cass specialmein levs tonscha in'admoniziun.

Art. 17 Mieds legals

Encunter disposiziuns dalla supratonza communal sin fundament dalla lescha cantunala ni da questa lescha sa ei vegnir recurriu en scret enteifer 20 dis dapi la communicaziun alla dertgira administrativa dil cantun.

VI. DISPOSIZIUNS FINALAS

Art. 18 Disposiziuns executivas

La suprastonza communal sa relaschar disposiziuns executivas.

Art. 19 Abrogaziun dil dretg da tochen dacheu

Cun l'entrada en vigur da quella lescha vegnan abrogadas la lescha d'ustria dils 28 da settember 1980 sco era tut las disposiziuns che stattan en cuntradicziun cun quella.

Art. 20 Vigur

Quella lescha va en vigur ils 1 da schaner 2000.

La presidenta communal:

Il canzlist communal:

Anna Bundi-Pally

Valentin Pally